

Balua na bini gba Piele Eli na kalanu

Piele aye nani balua na bini gba e pi omak-
ilisito inde u a'i o li bili inde me okpála inde
nani li Ebhe abhu o. Okpála ango-o atsambala
nani bhú Adji Minele, ali pápá na abebe. Engú
na ngbéngbé inde bhú balua inde-e, a ko nato
masi bhú okpála inde ngatatanga. Padhá de,
anga u adu nani ato mbolo li uo, kabula nabhuka
gba o-o. Ani aye balua ango-o ngubula naha
Bádha Ngali gba Yesu Kilisito pi uo, inde nakpi,
ne nazuku gba e ngaha pi okpála na'o 'to o 'to
engú inde ani apa me ni améne e nedhinga nago
ka ni ko. Nau ongú bhomu-o, uo ne kpadji koko
ade, a ayo bha me u ziba nakibila olikabhu ne
nambila ndjindji me, a ko nale inde u ngale uo
ne e bhú nabhuka gba uo na kuku-o. A ko la
di me, u asía makalá li 'kpí inde li Yesu Kilisito
ago lie (1:7).

Bhú nato masi inde li Piele ato e bhú okpála
bhú nedhinga na likabhu-o, ani aha di líli pi
okpála inde ngatanga balua inde me: u kobho
maka okpála gba Kilisito.

**Ongbengbe ongú inde bhú bhuku inde-e ngae
inde:**

Eli na kalanu 1:1-2

Nagama matá 'ngú ne toto pindji mukobho
inde li Ebhe ngaha e 1:3-12

Líli pindji mukobho na bubu 1:13 - 2:10
 Ongú inde a ayo me makilisito mene e bhú
 nedhinga na likabhu 2:11 - 4:19
 Namene kulu ne nakø li o ne kuto ka makilisito
 5:1-11
 Eli na soso 5:12-14

Piele yi omabhuka inde agbongbolo ne bili-e mayi

¹ Ma aye balua inde-e pi yi ngama Piele, ma ne bhala titima gba YesuKilisito . Ma aye pi yi okpala inde li Ebhe abhu o, ngayi okpala inde ngadu maka ogandji okpala bhú kuti koko, ngayi inde atsambala bhú ondu doto na Pote, ne Galatia, ne Kapadose, ne Adjia di ne Bitinia-o. ² Ebhe 'Dyi ní abhu nani yi bhutode maka ani aleke nani engú ango-o lie-o. Ani alo yi li kpadji gba Bu Bhobua , ani a'o yi kpi ngú nadu piga gba e, ngubula me yi du namanga Yesu Kilisito, amba ngute ani vula yi ngú nadu bubu kala ni. A ayo me badha bhú 'bu gba Ebhe-e du ne yi, amba ani ha di guo 'ngú pi yi ane mane.

Piele adhøø Ebhe, anga ani akóbho omabhuka makobho

³ A ayo me ní dhøø Ebhe, 'Dyi Ngámá gba ní Yesu Kilisito. Padhá de, anga ani abedhe ne ndjinga pi ní bedhe, ani atsia aha mukobho na mbia pi ní bhú nazuku Yesu Kilisito bhú ká okpala inde amu-o. Kaka-a, ní abhele djila ní li ani me ní azúku di mazuku. ⁴ Ní ti la di da na'o 'to ní 'to tia inde li Ebhe awo e pi ní opiga gba e-o. Ani awo tia ango-o pi ní abhúla. Tia ango-o zizi

de, a sisiti de, a pádha la di-i de. ⁵ Nganí okpála inde abhuka Ebhe-e, aní ngalila ní ne angu gba e, ngubula me ní sia mukobho na duduma angoo. Mukobho angoo asúno lie li sokpí.

⁶ Ka ongú angoo, yi kpi djali, abana ayo lie me yi zu olikabhu mbia inde-e li okpadji ngangá ngú nedhinga bedi-o. ⁷ Belegu olo inde asisiti masiti-e, okpála tsutsulu ngaiza bhú djua ngú naleleke me a kolo ndjindji. A si la masi maka nabhuka gba yi-e ane olo lie mane-e? Yi ngazu olikabhu bhomu-o ngubula me okpála mbila me a li nabhuka gba yi-e ne tata. A bhadi moko ne nabhuka gba yi-o. Ebhe améne mo-o ngú namene me, kabula nabhuka gba yi-e, aní toko yi, aní dhogò di yi, aní mene di me 'li yi kolo ngbéngbé li 'kpí li Yesu Kilisito asúno lie lie bhú sangu gba e-o. ⁸ Belegu yi u aní lie de-e, yi ne mukunda pi aní. Abana yi nde lie ngau aní ade-e, yi ngabhuka aní. Kaka-a, yi ngakpi djali naali, djali inde li kpála ti da nakpokpo lele e de, ⁹ anga yi asia makalá na nabhuka gba yi-e masia. Makalá angoo, a ko li bua yi akóbho lie-o.

¹⁰ Nani kalanu-o, opolofeta agili má bhotobhoto me o mbila kpadji li Ebhe akóbho okpála lie-o. U adu akpokpo 'ngú kalanu pi okpála pindji bádha bhú 'bu inde li Ebhe a'o nani e pi yi-o. ¹¹ Bua gba Kilisito inde adu bhú uo-o apa pi uo kalanu me, Kilisito azú likabhu. Pipita-a, aní tsia sía sangu gba Ebhe-o. Opolofeta angoo agili nambila me ongú bhomu-o akódho 'kpí nadho. U atsia agili di nambila me a adú lele pi. ¹² Ebhe atsia asuno pi opolofeta bhomu-o me

ongú ang-o kódho 'kpí bhú nedhinga gba uo-o de, engú bini, akódho mangbo 'kpí bhú 'kpí gba yi. Mbia inde-e, okpála inde ngakpokpo Bádha Ngali-e , akpokpo ongú bhomu-o pí yi akpokpo. U akpokpo pí yi ne angu gba Bu Bhobua inde li Ebhe atima e-o. Belegu oandjelu , u akunda nau ongú ang-o.

Piele apa pí omabhuka me u du bubu kala Ebhe

¹³ Kaka-a, yi du bedhe ndu 'kpí hana. Yi bhulu djila yi, yi 'o 'to yi libhomu 'to bádha bhú 'bu inde li Ebhe ahá e pí yi li 'kpí li Yesu Kilisito asúno lie lie bhú sangu gba e-o. ¹⁴ Yi manga Ebhe maka ongisi na babadha. Yi akpáta matá kpadji na sisiti inde nani yi adu nakpata e kala me yi nde mbila Yesu Kilisito de-e de. ¹⁵ Engú bini, yi du bubu bhú mukobho gba yi-e libhomu, maka li Ebhe inde a'i yi-e nde lie bubu-o. ¹⁶ Padhá de, anga u aye bhú Bhuku gba Ebhe-e me: «Yi du bubu, anga ma bubu.†»

¹⁷ Nedhinga yi ngayo Ebhe lie, yi nga'i ani me «'Dyi ní». Padhá de, anga ani ngakodho 'ngú gba okpála nakpata lele kulu gba kpála ne kpála. Ani tsia la di bhúla kpála bini de. Kaka-a, nedhinga yi nde nga bha lie píla doto-o, yi manga ani bhú ndu 'ngú hana inde yi ngamene e-o. ¹⁸ Yi mbila ndjindji maka li Ebhe agbegbe yi lie li kpadji ndu ongú hana na padhá padhá inde li odyi yi apana e pí yi-o. Ebhe kala yi ne ehe inde ngasiti masiti maka aladja, i du di-e olo de. ¹⁹ Engú bini, ani akala yi ne ngute Kilisito inde ane ndu

† **1:16** 1:16 Tsia bhú Lev. 19:2.

'he hana-o. Kilisito maka ndili kandelø inde aha mukobho gba e, u atsia abhøø e-o. Anì bubu kala Ebhe, ehe na sisiti bhú anì belegu ade bini. ²⁰ Ebhe abhu nani anì ngú nakpi lì 'ngú gba okpála kala me anì bho doto, la mbia inde-e, anì atsia asuno anì bhú onedhinga na soso inde-e mbámbá ngubula me anì kobho yi. ²¹ Kabula Kilisito-o, yi abhuka Ebhe inde azuku anì bhú ká okpála inde amu-o, anì atsia aha sangu pi anì. Kaka-a, yi nga'o nabhuka gba yi-e bhú Ebhe, yi la di nga'o 'to yi 'to anì.

²² Yi avulu bua yi avulu ngú nadu ne mukunda na kukulu sunda yi. Yi avulu bua yi ango-o li kpadji nakpata ongu na kukulu inde li Ebhe asuno e pi yi-o. Ka 'ngú ango-o, ma apa pi yi me, yi du ndu 'kpi hana ne mukunda na kukulu sunda yi di ne bádha bua. ²³ Yi mbila ndjindji me Ebhe aha mukobho na mbia pi yi li kpadji na eli gba e na duduma, inde di ngaha mukobho pi okpála-o. Ebhe inde i kpikpi de-e aha mukobho ango-o pi yi ngae makpe. Yi sia mukobho ango-o ka odyi yi inde amú mamu-o de. ²⁴ Padhá de, anga u aye bhú Bhuku gba Ebhe-e me:

«Ndu okpála hana ngamu maka ulu a'u'ulu lie-o.

Bádha gba kpála-kuti ngandjia maka bádha gba felele andjindjia lie,

i du me a nde anuku-o.

²⁵ Engú bini, eli gba Ngámá-a ngadu duduma ne duduma,†»

Eli ango-o, a ko Bádha Ngali inde u akpokpo e pi yi-o.

† 1:25 1:25 Tsia bhú Isa. 40:6-8.

2

Piele apa me omabhuka da maka teme na mukobho

¹ Yi bala ndu sisiti 'ngú hana kabula mukobho na mbia inde li Ebhe aha e pi yi-o. Yi apíte kpála bini de, yi adú amene engú na kali de, yi adú ne gumu 'he gba kpála de, yi adú di apa 'ngú li okpála koko sisiti de. ² Yi da maka ongisi u azu o na mbia, inde ndu 'kpí hana ne gumu nandji 'ka. Yi da bhadi ne gumu Eli gba Ebhe-e moko ngubula me yi bhele, akólo li ekpí li Ebhe akóbho yi lie libhomu-o. ³ Yi da bha ne gumu eli ango-o na paká paká, anga yi ambila bádha 'ngú inde li Ngámá ngaha e li bua yi ambila.

⁴ Yi dyudyo liyi de Ngámá Yesu Kilisito masikpe, a ko teme na mukobho, inde li okpála abhike nani e ne 'ili me a li kulu ade-o. La-a, bhú djila Ebhe inde alo nani teme ango-o, ani atsia au me a li kulu ane ndu oteme koko hana. ⁵ Ngayi makpe-e di-e, yi da maka teme inde na mukobho, amba Ebhe ha yi, ani tsia yiki eti gba Bu Bhobua ne yi maka 'ngbé 'ti Ebhe gba omaYuda-o. Bhú 'ti ango-o, yi akólo piga gba odimandø inde aha lio pi Ebhe, ngubula naha makiso na Bu Bhobua, inde ndjindji pi Ebhe li kpadji gba Yesu Kilisito. ⁶ Padhá de, anga u aye bhú Bhuku gba Ebhe-e me:

«Yi gbo nga 'dje yi, ma alo teme bini na mase,
 ma a'ó bhú gudhu na Siona
 maka teme inde abi eti-e libhomu.

Kpála inde azíba teme ang-o sía nũmũ belegũ de bini.†»

7 Pì yi okpála inde abhuka-a, teme ang-o pì yi lì kulu ane ndũ oteme koko hana. Engú bini, pì okpála bhende ì bhuka de-e, a mo-o ade. Padhá de, anga u aye bhú Bhuku gba Ebhe-e me:

«Teme inde lì okpála nayiki eti-e abhike e-e, akolo teme inde abi eti-e libhomu ngae.†»

8 U aye matá di bhú Bhuku gba Ebhe-e me:

«Okpála ngado 'dhũ o lì teme ang-o, ì tsia méne me u gũ 'i o kuto.†»

U ngado 'dhũ o tété, anga u ayala nakpata 'lì Ebhe, Ebhe apa nani bhũtode me a méne lie mo-o.

9 La pì yi-e, yi ne piga inde lì Ebhe abhũ o-o. Yi ne piga gba odimandø inde ngamene kulu pì 'ngbé Ngámá Ebhe. Yi ne piga okpála inde lì Ebhe a'o o kpi pì e. Anì abhũ yi ngubula me yi kpokpo ongbengbe 'ngú inde ñ amene e pì okpála. Anì a 'i yi me yi ze bhú biti, amba yi go lì zì 'ke gba ñ inde ngatsi ane ndũ 'he hana-o.

10 Nani kalanũ-o, yi dũ ne okpála gba Ebhe de, engú bini mbia inde-e, yi akolo okpála gba anì. Nani kalanũ-o, yi sia ndjinga gba Ebhe-e de, engú bini mbia inde-e, yi asia ndjinga gba anì asia.

Piele aha lílì pì omabhuka pìndjì lele namanga lío, di ne namanga Ebhe

11 Ondaise ma na mũkũnda, yi mbila ndjindjì me yi pìla doto ei ne ogomago. Kũtì gba yi-e pìla doto inde-e ade. Kaka-a, ma ayo ka yi me, yi adú

† 2:6 2:6 Tsia bhú İsa. 28:16. † 2:7 2:7 Tsia bhú Ets. 118:22.

† 2:8 2:8 Tsia bhú İsa. 8:14.

améne osisiti 'ngú li gumu e nde li bua yi-e de, anga ongu bhomu-o ngazu bili li bhobua yi ngae. ¹² Yi mene ehe liyi bhú ká omupagano ndjindji ngubula me, abana u du apa 'ngú li yi sisiti-e, u de u obabadha 'ngú inde yi ngamene e-o, amba ekpí li Ebhe asúno lie pí uo lie, u de dhogè aní.

¹³ Yi kè liyi ne kuto kala ndu okpála hana inde ngau píla doto, kabula Ngámá gba ní Yesu Kilisito inde yi ngakpata nganda e-o. Yi kè liyi ne kuto kala ongbengbe ongámási na doto inde ngau pí ndu okpála hana-o. ¹⁴ Yi kè liyi ne kuto kala oguvelenele inde li 'ngbé ngámá a'o o-o. Aní a'o uo ngubula me u mene okpála inde ngamene siti 'ngú-o kpekpeke, di ne me u dhogè obhende ngamene bádha 'ngú-o. ¹⁵ Padhá de, anga Ebhe akunda me yi gbite 'bhè ngingi 'ngú gba okpála inde ayala nambila Ebhe-e ne namene bádha 'ngú. ¹⁶ Yi mene ehe liyi maka okpála inde bhú bali ade. Engú bini, yi apá de me, o nde lie bhú bali ade-e, o mene siti 'ngú bhú gandji-e de. Yi mene mangbo liyi maka obalise gba Ebhe. ¹⁷ Yi manga ndu okpála hana. Yi du ne mukunda pí ondaise yi bhú 'bu nabhuka . Yi manga ongbengbe ongámási mamanga. Yi dhogè Ebhe.

¹⁸ Ngayi obalise-e, yi kè liyi kala omakulasi yi ne kuto. Yi manga uo ndjindji. Yi amánga bha bini obhende na bhuku 'ngú-o de, inde ngamene yi ndjindji-e de, yi manga di obhende ngamene yi sisiti-o. ¹⁹ Padhá de, anga Ebhe ngasuno bádha bhú 'bu pí kpála inde ngazu likabhu sakpa okpála koko padhá me aní nde mene siti 'ngú de,

li ani tsia kíbila likabhu ango-o kabula 'li Ebhe.
 20 Yi dɔ azɔ bhikpa ka siti 'ngú yi amene e, a
 dhógò yi tété da? Engú bini, i dɔ me yi nde
 ngazɔ likabhu sakpa okpála koko kabula bádha
 'ngú inde yi amene e, li yi kibila likabhu ango-o,
 a ko bádha 'ngú bhú djila Ebhe. 21 Ani a'i yi me
 yi mene moko, anga Kilisito azɔ bhadi likabhu pi
 yi moko. Ani apana kpadji pi yi, amba yi mene
 bhadi maka ni.

22 Ngaani-e, ani mene siti 'ngú de.

Ani pa eu belegɔ de bini.†

23 Li okpála asobho ani lie, ani gie sobho pi uo
 de.

Abana u ato mbolo li ani lie, ani gɔ okpála
 ango-o de.

Ani a'o mangbo lie sakpa Ebhe inde
 ngakodho 'ngú ngbingbili-o.

24 Ani abha sisiti 'ngú gba ní-e, ani atsia abi li
 kute e.

Ani abi siti 'ngú ango-o nedhinga u abhøle
 ani lie li kulusi ngubula me,

ní dɔ maka okpála inde amu li pápá na siti 'ngú
 amu,

di ne me ní dɔ mangbo bhú mukobho inde
 ngbingbili.

Yi akobho ka oeka li ani abi e-o.

25 Padhá de, anga yi dɔ nani maka okandøle inde
 angita.

Engú bini, mbia inde-e, yi agie liyi agba
 málila, inde ngalila bua yi-o.

† 2:22 2:22 Tsia bhú Isa. 53:9.

3

Lele dasundũ sũnda olisi ne obhosi

¹ Ma ngapa di pĩ yi olisi moko, yi kɔ liyi kala obhosi gba yi-e ne kuto da napa me abana li bini bini bhú ká uo bhuka 'li Ebhe de-e, u de dji bua o ka nau lele mukobho gba yi, abana yi pa 'ngú pĩ uo pĩndji eli gba Ebhe-e de-e, ² u de bhuka kabula nau me lele dasundũ gba yi-e ndjĩndji, yi la di ngamanga uo. ³ Yi adú bha bini aleke kute yi akilidjo de, abana i dũ bhú napulũ sundjo yi, abana i dũ nadyi omagege na olo, abana i dũ di-e bhú nadyi obongo bhe na mase naali. ⁴ Engú bini, yi leke mangbo liyi bhú naleke bua yi. Yi kɔ liyi ne kuto, yi dũ di ne guo 'ngú . Padhá de, anga a bhomũ-o bádha bhe i zizi de-o, a nganga li Ebhe naali. ⁵ Olisi na kalanũ inde adũ akpata Ebhe-e, inde adũ di na'o 'to o 'to ani-e, adũ nani aleke lio ne ngua bádha kulu bhomũ. U adũ la di namene líli gba obhosi gba o-o. ⁶ Yi bhundja nga pĩndji Sala. Ani adũ amene nani líli gba 'ko e Abalahama ndjĩndji. Ani adũ a'i ani me ngámá gba ni. Yi ne ongisi na olisilisi gba Sala na paká paká, i dũ me yi nde ngamene bádha 'ngú, yi nde 'o la di de me tsulũ ha angu yi de-o.

⁷ A bhadi moko pĩ yi obhosi, a ayo me dasundũ gba yi ne olisi gba yi-e dũ ndjĩndji. Yi mbila ndjĩndji me uo bhũbhũkũ ane yi. Yi manga uo mamanga, anga mukobho inde li Ebhe ahá e pĩ yi bhú bádha bhú 'bu gba e-e, ani ahá pĩ ndũ yi ne uo hana. Yi mene mo-o, ehe bini ní kpadji kala mayo gba yi-e de.

Lele dasundu gba omabhuka

⁸ Ngú nabu tata-a, yi dũ ndũ yi hana ne bua bini, yi dũ amene bádha 'ngú li yi sũnda yi, yi dũ ne mukũnda sũnda yi maka ondaise . Yi dũ ne ndjinga sũnda yi, yi kɔ la di liyi sũnda yi ne kuto. ⁹ Yi agíe siti pí siti de, i dũ di-e sobho pí sobho de. Li kpála sobho yi-e, yi agíe sobho pí ani de, engú bini, yi yo mangbo Ebhe me ani tuko bisagu pí ani. Padhá de, anga nedhinga li Ebhe a'i yi lie me yi dũ piga gba ni-e, ani apa nani pí yi me ni atúko bisagu pí yi. ¹⁰ A maka u aye lie bhú Bhuku gba Ebhe-e me:

«Li kpála kũnda me mukobho gba ni-e dũ ndjindji-e,

ani kũnda la di me ni dũ bhú djali-e,

a ayo de me ani dũ apa siti 'ngú-o de,

a ayo la di de me ani dũ apa eu-o de.

¹¹ A ayo me ani dji 'ngbũ e li siti 'ngú,

ani mene mangbo bádha 'ngú.

Ani gili guo 'ngú ne kekele hana.

¹² Padhá de, anga Ngámá ne djila e li okpála inde ngamene ngbili 'ngú ,

ani bedhe ngú nadjé mayo gba uo.

Engú bini, ani ngadji 'ngbũ e li okpála bhende ngamene osisiti 'ngú-o.†»

Piele apa me omabhuka kibila likabhu me u nde ngamene bádha 'ngú

¹³ I dũ me yi nde nga'o bua yi hana li namene bádha 'ngú-o, a ko da inde améne yi sisiti-e?

¹⁴ Yi dũ ne djali nedhinga yi ngazũ likabhu lie

† 3:12 3:10-12 Tsia bhú Ets. 34:13-17.

ka bádha 'ngú inde yi ngamene e-o. Ka 'ngú ango-o, yi adú ne tsulu okpála inde ngakúnda namene yi sisiti-e de, bua yi abáka di-i de. ¹⁵ Yi dhögø mangbo Kilisito li bua yi maka Ngámá gba yi. Yi dũ bedhe ndũ 'kpí hana ngú nakpokpo 'ta yi nga'o 'to yi lie 'to Kilisito pĩ okpála bhende ngayi yi tété-o. ¹⁶ Engú bini, yi kpokpo ne bhuku bua, amba yi manga la di uo mamanga. Yi mene ndũ 'kpí hana engú inde yi au e li bua yi me a ndjindji-o, amba okpála bhende ngapa 'ngú li yi sisiti-e, sia nãmũ nedhinga u ngasobho bádha kulu yi ngamene e kabula 'li Kilisito lie-o. ¹⁷ Padhá de, anga yi sia likabhu ka siti 'ngú inde yi ngamene e, engú tété ade. La-a, yi sia likabhu kabula bádha 'ngú inde yi ngamene e, i dũ me Ebhe nde aziba mo-o, bhobhomũ-o ane ne bádha ngae.

¹⁸ Padhá de, anga Kilisito adje di likabhu kabula siti 'ngú gba ní-e bhutsibhutsi bini má ngbi! Ngaani kpála inde i mene siti 'ngú de-e, ani akpi ngubula nakobho ní okpála inde ngamene siti 'ngú-o, ngubula me ani mba bhúla ní agba Ebhe. Okpála abhøø ani bhú kute, engú bini Ebhe atsia azuku ani li kpadji gba Bu Bhobua .

¹⁹ Ka angu gba Bu Bhobua bhomũ-o, ani atsia anũ belegũ di nakpokpo Bádha Ngali gba Ebhe-e pĩ obua inde amu inde bhú tikpũ-o. ²⁰ A ko bua okpála inde ayala nani nadjĩ bua o nedhinga li Nũa adũ abho 'ngbé zabũ lie-o. La-a, Ebhe adjeke nani uo ne 'ndjá bua. Okpála inde li engu-o akobho nani o-o, u dũ bhelé de. A adũ bha nani okpála madjina padhá inde a'ũ'ũ

nani bhú zabu-o. ²¹ Engu bhomu-o, a ko kulu batisimo. Ebhe ngakobho yi mbia inde-e li kpadji na batisimo bhomu. Batisimo ango-o ngubula na'e zibotu na kute ade, engú bini, a ngubula naha lio libhomu pi Ebhe ne bua nambila ngbili 'ngú. Ebhe ngakobho yi li kpadji na batisimo ango-o ka li Yesu Kilisito azuku lie-o. ²² Ani atapa abhúlá, ani adu de Ebhe li pápá na kokpa. Ani ngaú pí 'ndji oandjelu di ne pí 'ndji ndu obua hana inde ne angu abhúlá oo-o.

4

A ayo me omabhuka mene engú li lele mukobho na mbia

¹ Ní mbila ndjindji me Kilisito adje likabhu bhú kute. Kaka-a, ngayi di-e, yi du bedhe ngú likabhu maka ani. Padhá de, anga kpála inde adje likabhu bhú kute-e, a'o namene siti 'ngú a'o. ² Nayie pi mbia inde-e, nedhinga hana inde yi améne e píla doto-o, a ayo me yi mene bhú mukobho gba yi-e engú inde li Ebhe akúnda e-o. Yi améne engú na sisiti inde li bua yi ngakúnda e de. ³ Padhá de, anga yi abala nako nedhinga gba yi-e bhelé bhú namene engú li omupagano amemene e-o. Yi améne matá mo-o de. Yi adu nani akúnda olisi di ne obhosi ngangá, gumu kute aha di nani angu yi maha. Yi adu abhele kuo yi ne pandi, yi adu apo bhúla yi ngú nandji pandi, yi adu adho 'bi na sisiti. Yi adu di amene engú inde ayo la ndju nako de me yi mene e de-o, anga yi adu adhögø oebhe na eu.

⁴ La mbia inde-e, omupagano ngangamba, u la di ngasobho yi, anga yi kə matá nganda uo bhú siti 'ngú inde u ngamene e na muge muge-e de. ⁵ Engú bini, ekpí akólo makolo. Li 'kpí angoo, u akpókpo 'ngú gba o-o kala Ebhe inde bedhe ngú nakodho 'ngú gba okpála inde ɛɛ, di ne okpála bhende amu-o. ⁶ Ka 'ngú angoo, Kilisito anu nani belegu nakpokpo Bádha Ngali pi okpála inde amu-o. Aní akpokpo pi uo ngubula me, maka li Ebhe akodho 'ngú gba okpála hana lie, ngauo di-e, Ebhe akódho 'ngú gba uo-o nakpata lele maka u adu nani lie píla doto, amba u du bhú mukobho maka Ebhe li kpadji gba Bu Bhobua .

Piele apa me omabhuka mene kulu ne makalá u asia e ka Ebhe-o

⁷ Sokpí akolo masakpe. Kaka-a, yi du ne bádha mabhundja, yi bhulu djila yi, amba yi du nayo Ebhe. ⁸ Kala ndu 'ngú hana-a, yi du ne mukunda na paká paká sunda yi, anga bhobhomu-o méne me yi mbu li bhiti osisiti 'ngú li okpála koko ngamene e-o. ⁹ Yi sia okpála inde ngago agba yi-e ndjindji. Yi asia uo ne nadi mutokono de. ¹⁰ A ayo me yi teteke liyi ne makalá inde li Ebhe aha e pi yi bhú bádha bhú 'bu gba e-o. Yi mene mo-o, yi du maka obabadha okpála inde ambila namene kulu ne makalá li Ebhe aha e pi yi kpi kpi kpi-o. ¹¹ A ayo me kpála inde asia makalá nagama 'ngú-o, kpokpo oeli gba Ebhe-o . A ayo me kpála inde asia makalá namene kulu pi okpála koko-o, mene ne angu li Ebhe aha e pi ani-e hana, amba bhú ndu 'ngú hana-a, okpála dhogə Ebhe ka Yesu Kilisito. Padhá de, anga ndu okpála

hana ngadhögö Ebhe, ndu angu hana sakpa ani duduṃa ne duduṃa. A adu moko!

Piele apa me omabhuka kibila likabhu ka 'li Kilisito

¹² Ondaise ma na mukunda, yi angamba ka okpekpeke da 'ngú yi ngali bhú e de. Ongú bhomu-o ngakolo li yi ngabula nambila lele nabhuka gba yi-e nde lie-o. Yi abhúndja de me a ko ongú koko kpi-e de. ¹³ Engú bini, yi kpi djali, anga yi ngabi bhomu-o té likabhu inde li Kilisito adje e, amba li 'kpí ani asúno sangu gba e lie pi ndu okpála hana-a, yi de bedhe di ne djali na kuo kuo. ¹⁴ Yi du ne djali nedhinga li okpála nde ngasobho yi lie kabula 'li Kilisito-o. Padhá de, anga Bua na asasaua gba Ebhe-e ngadu bhú dabili bini ne yi. ¹⁵ I du me suka yi nde ngazu likabhu-o, adú de me ani amene siti 'ngú-o de. A ayo di de me ani zu likabhu anga ani abhelo kpála de, ne me ani azi 'he-e de, i du di-e me ani ali bhú 'ngú gba kpála koko-o de. ¹⁶ Engú bini, i du me kpála nde ngadje likabhu anga a ko makilisito-o, a ayo de me ani dje numu tété-e de. Ani gie mangbo heni pi Ebhe, anga a ko kpála ka Kilisito.

¹⁷ Nedhinga akolo, nedhinga inde li Ebhe akódho 'ngú gba okpála lie-o. Yi mbila la me, ani akpó lita nakodho 'ngú ango-o li okpála gba e makpe. I du la mo-o, bhende gba okpála inde ngayala naziba Bádha Ngali gba Ebhe-e adú la ibili naae lele pi? ¹⁸ U aye bhú Bhuku gba Ebhe-e me:

«† dɔ me da nakobho ka okpála inde ngbingbili-e
 nde kpekpeke-e,
 engú bhe gba okpála inde ngayala Ebhe, inde
 la di ngamene siti 'ngú-o,
 adú la ibili lele pí?†»

¹⁹ Kaka-a, okpála bhende ngadje likabhu anga
 Ebhe aziba mo-o, nɛ ne namene bádha 'ngú ne
 kalanɛ. U 'o la di lio makpe sakpa kpála inde
 abho ní, inde amemene 'ngú maka aní apa lie-o.

5

A ayo nalila okandələ gba Ebhe-e malila

¹ Ma ngagama 'ngú mbia inde-e pí okpála
 bhende bhú ká yi ne obhelesi okpála na Piga gba
 Ebhe-o . Ma di ne bhele kpála na Dadjua gba
 Ebhe maka uo. Ma au likabhu li Kilisito azɛ e ne
 djila ma. Ma asía la di té sangu gba Kilisito inde
 li Ebhe asúno e pí ní-o. Kaka-a, ma ngayo ka yi
 me: ² yi lila okpála inde li Ebhe a'o o sakpa yi-e
 malila. Yi lila uo maka li kpála nalila okandələ
 alilila okandələ gba e lie-o. Yi alíla uo ka napa de
 me u agbite yi tété ne kpéke-e de. Engú bini, yi
 lila uo ne bádha bua maka li Ebhe akunda lie-o.
 Yi améne kulu ngubula nasia tia de, engú bini yi
 mene me yi nde abedhe ne mukunda bedhe. ³ Yi
 alíla okpála li Ebhe a'o o sakpa yi-e de me yi nde
 ako angu yi pí uo mako-o de. Engú bini, yi mene
 me okpála kpata lele dasundɛ gba yi-o. ⁴ Li yi
 mene mo-o, ekpí li Yesu Kilisito inde ngalila ní-e
 agó lie-e, yi sía makalá na sangu ka aní. Makalá
 ango-o ngadɛ dɔdɔma ne dɔdɔma.

† **4:18** 4:18 Tsia bhú Gbt. 11:31.

Yi kə liyi kala Ebhe ne kuto

⁵ A bhadi moko pi yi omakombise, yi kə liyi ne kuto kala obhelesi okpála gba yi-o. Ma ngapa pi ndu yi omabhuka hana me, yi kə liyi ne kuto sūnda yi. Yi teteke liyi sūnda yi, padhá de, anga u aye bhú Bhuku gba Ebhe-e me:

«Ebhe ngadji 'ngbu e li obhulu 'ngbé 'ndji,
engú bini, ani ngaha bádha bhú 'bu pi
okpála inde ngakə lio ne kuto.†»

⁶ Kaka-a, ma ngapa pi yi me yi kə liyi ne kuto kala Ebhe inde ne angu, amba ani 'e'e yi ne abhúlá li nedhinga ani akunda lie-o. ⁷ Yi 'o ndu 'ngú hana inde ngato mbolo li yi-e sakpa ani, anga ani ngalila yi.

⁸ Yi du bedhe, yi lila liyi, padhá de, anga djabulu bhulu yala gba ni-e ngadji bili maka kingbi inde ngangulumba. Ani ngagili me ni azú da-ie. ⁹ Yi lu kala ani kpekpeke bhú nabhuka . Yi mbila ndjindji me omabhuka koko píla doto libhomu-o bhadi ngadje likabhu maka yi. ¹⁰ Yi adjé nga matá likabhu ngubula nedhinga bedi. Engú bini, Ebhe inde bhulu bádha bhú 'bu-o, a'i yi ngú nali bhú sangu na dudu ma gba e bhú nakpetse liyi bhú dabili ne Kilisito. Ani aléke yi ngae makpe, ani tsía méne me yi lu kpekpeke bhú ndu 'ngú hana má kpəkəbhə! ¹¹ A ayo me ani u dudu ma ne dudu ma. A adu moko.

Oeli na soso

¹² Silivano ateteke ma li naye mbo ndu balua inde-e pi yi ngae. Ma ambila me a ko ndai ní

† 5:5 5:5 Tsia bhú Gbt. 3:34.

makilisito inde ngamene 'ngú li lelele. Ma aye balua inde-e ngubula nato masi bhú yi, di ne napa pi yi me a inde-e bádha bhú 'bu na kukulu gba Ebhe, yi gbite liyi tété.

¹³ Omabhuka inde bhú Babilona* ei, inde li Ebhe abhú o maka aní abhú di yi lie-e, yi yi mayi. Ndili gba ma Maloko yi di yi mayi. ¹⁴ Yi yi liyi sūnda yi, yi kama liyi sūnda yi ngú nasuno me yi ne mukūnda sūnda yi. A ayo me guo 'ngú dū bhú dabili bini ne yi okpála inde bhú 'bu Kilisito hana.

* **5:13** 5:13 Babilona: Okpála bhelé ngabhundja me li bili inde-e, a akūnda nasuno gūdhū na Loma .

Gandja na Mbia
Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

6b4904fb-f8ce-5931-8218-7cee8914232c